

Relaciona cu tendencia di All inclusive

Minister Otmar Oduber a contesta preguntanan den Parlamento

Ya caba pa algun tempo ta trahando riba e concepto di ley riba regulacion di all inclusive na Aruba.

Durante un reunion yama pa e Comisionnan Fiho di Turismo y Economia di Parlamento Minister Otmar Oduber a contesta tur e preguntanan cu a bin di e miembronan di Parlamento presente.

Regulacion

Un di e preguntanan ta riba e tardansa pa bin cu un regulacion pa e tipo di hotelnan aki. Riba esaki e mandatario a enfatisa di no kier comete e mesun erornan di pasado. E ta referi na e echo unda ex Minister President di Aruba Sr. Nel Oduber a expresa di no tin interes pa sa kico e organizacion di AHATA ta pensa ya cu Riu ta un producto di un calidad haltu y lo tin bon beneficio pa Aruba. Minister Oduber a sigui menciona: "Awe nos ta scucha mesun skina politico ta critica Riu, y no ta di acuerdo cu Riu mas aki na Aruba. Nos kier evita e tipo di expresionnan ey!"

Concepto di Ley

Desde 2013 na momento cu tabata conoci e intencion di Riu pa cumpra Westin a inicia un proceso di consulta, unda a conduci varios estudio y awor nos ta na e punto cu tin e concepto di leyman, unda cu por a presenta esakinan na Parlamento durante e reunion. A demostra tambe cu no ta solamente un cambio di ley kier yega na dje pero tambe ta pensando riba



un structura nobo di un impuesto special pa e all inclusive hotelnan na Aruba, pa di e forma aki nan por paga e parti cu nan merece di paga e comunidad di Aruba pa operacionnan di un hotel di e tipo aki.

E leyman mester ta di tal forma hinca den otro, cu tin un espacio di un temporada di transitorio, pa tur esunnan cu ta operando na e momentonan aki bou di un capa di all inclusive. Un otro cambio tambe ta encera cu antes un Minister di Salubridad so tabata duna permiso awor ta añadi aprobacion di un Minister di Turismo. Ta condicionnan nobo mara na interes general di Pais Aruba. Den e proceso e mandatario ta comenta cu a comunica esaki directamente cu tur e partidonan envolvi cu e compra di Radisson. Sr. Oduber ta menciona cu e ta spera cu esaki lo wordo tuma den bon consideracion.

Decision di Corte

Ta warda riba decision di corte e siman aki y di parti Gobierno a segura cu e pensamiento riba e maneho ta bon conoci pa tur hende, a haci apelacionnan tambe riba hopi di esunnan cu ta forma parti di e negociacionnan tumando luga na e momentonan aki, y ta spera cu prome cu e sentencia por haya un bon noticia.

40 por ciento all inclusive y 60 por ciento E.P.

Minister Oduber a termina bisando cu e ta kere cu Aruba tin un bon mix actualmente, pero mester control. Si no tin control nos ta bay den direccion di Caribe cu na e momentonan aki tin casi 70 por ciento di su operacionnan all inclusive. Aruba awor ta den un 30 por ciento y tabata asina caba pa basta tempo. Esaki incluyendo hotelnan cu ta opera di e forma aki tambe

manera un Hyatt, Marriott y tur e resortnan cu ta opera un 10 pa 15 por ciento como all inclusive, mas e unico hotelnan cu ta carga sosten di gobierno cu ta un Zoetry y tambe un Bahia Principe. Esaki lo traduci den un mix di 40 por ciento all inclusive y 60 por ciento E.P. cu ta un mix cu e mandatario ta di opinion cu si nos por logra mantene esey, compara cu lo cual tin den Caribe y e tendencia di crecimiento cu tin den Caribe, Aruba lo ta bon sirbi den e añanan nos dilanti pa por sigui haya turismo di calidad. "Mester percura cu esunnan cu ta bin pa all inclusive ripara tambe cu no ta cualkier all inclusive compara cu tur otro parti di mundo, unda nan ta keda cera den e hotel. Nan mester realisa cu nan por sali cana libremente, cu seguridad, y nan ta haci uzo tambe di tur e otro facilidatnan cu tin economia pafu di e resort." □